

Isu kebajikan pelajar jadi agenda utama

Kuala Lumpur: Isu kebajikan mahasiswa menjadi agenda utama bakal diperjuangkan kebanyakan pemimpin baru Majlis Perwakilan Pelajar (MPP) bagi sesi 2012/2013.

Antaranya merapatkan jurang komunikasi di antara pihak pentadbiran dan mahasiswa yang menjadi inti pati Manifesto wakil Penggerak Mahasiswa Universiti Malaya (UM), Siti Nur Fareha Razali, 22, yang menang kerusi Fakulti Sastera dan Sains Sosial (FSSS).

“Sebelum ini mahasiswa FSSS menggunakan saluran Persatuan Mahasiswa peringkat fakulti sebagai orang tengah dalam mengemukakan masalah dan aduan. Ini mengambil masa agak lama untuk sesuatu masalah diselesaikan, malah ada yang terperap begitu saja,” katanya yang memperoleh jumlah undian

kedua tertinggi sebanyak 366 undi.

Pertingkat keselamatan mahasiswa

Sementara itu, calon Promahasiswa (Pro-M) yang menang Kerusi Umum di UM, Nurul Nabila Shamsuddin, 20, pula akan memastikan aspek keselamatan mahasiswa dipertingkatkan pengurusan universiti, selain meningkatkan kemudahan perkhidmatan WiFi di kampus.

Calon Proaspirasi (Pro-A) Universiti Putra Malaysia (UPM), Muhamad Faiz Muhamad Pauzi, 23, yang meraih jumlah undian kedua tertinggi dalam perebutan Kerusi Umum, berazam menangkis persepsi MPP mengikut telunjuk Bahagian Hal Ehwal Pelajar (BHEP).

“Tidak dinafikan ada pelajar keberatan menjadikan

MPP rujukan apabila berdepan masalah terutama akademik kerana berasa badan ini dipengaruhi BHEP. Saya mahu mengikis persepsi negatif ini

“
Tidak dinafikan ada pelajar keberatan menjadikan MPP rujukan apabila berdepan masalah terutama akademik kerana berasa badan ini dipengaruhi BHEP”

**Muhamad Faiz
Muhamad Pauzi,**
Calon Pro-A UPM

dan menggantikannya dengan tanggapan MPP badan kepimpinan boleh diharap,” katanya yang mendapat mandat 9,153 pelajar.

Struktur semula MPP

Jurucakap kumpulan Pro-M UPM, Tarmizi Anuwar, pula mencadangkan penstrukturan semula organisasi MPP supaya mengambil contoh sistem Kerajaan Pusat dan negeri dengan calon menang kerusi umum seharusnya menganggotai MPP peringkat universiti, manakala pemenang kerusi fakulti membentuk jawatan kuasa khas di fakulti masing-masing.

“Pro-M UPM menggesa calon MPP terpilih menumpukan tugas menjaga kebajikan, keselamatan dan meningkatkan mutu akademik mahasiswa atas amanah dan mandat diterima,” katanya.